

小方壺齋

小方壺齋

小方壺齋輿地叢鈔第十一帙目錄

南清河王錫

祺壽堂甫輯

海錄

山陽丁萬寶校
安東郭藻鈔

大西洋記

嘉應楊炳南著

西方要記

同安陳倫炯著

通商諸國記

泰西南懷仁著

英吉利地圖說

泉蘭朱克敬著

歐洲總論

桐城姚瑩著

中西關繫略論

闕名

乘槎筆記

美國林樂知著

航海述奇

滿洲斌椿著

初使泰西記

鐵嶺張德彝著

使西書略

滿洲宜厚著

使法事略

壽州孫家穀著

使西紀程

美國林樂知著

英輶日記

湘陰郭嵩燾著

隨使日記

番禺劉錫鴻著

使英雜記

鐵嶺張德彝著

鐵嶺張德彝著

使法雜記

鐵嶺張德粹著

使還日記

鐵嶺張德粹著

使德日記

崇明李鳳苞著

出使英法日記

湘鄉曾紀澤著

歐遊隨筆

大興錢德培著

歐遊雜錄

無錫徐建寅著

使西紀程

新化鄒代鈞著

出洋瑣記

大興蔡鈞著

出使須知

大興蔡鈞著

瀛海采問紀實

錢塘袁祖志著

西俗雜誌

錢塘袁祖志著

涉洋管見

錢塘袁祖志著

出洋須知

錢塘袁祖志著

歸國日記

黃巖王詠霓著

瀛海論

湘陰張自牧著

出使英法義比四國日記

無錫薛福辰著

蠡測卮言

湘陰張自牧著

瀛海卮言

清泉王之春著

西事蠡測

歸安沈 純著

漫遊隨錄

長洲王 韜著

遊英京記

闕 名

遊歷筆記

闕 名

泰西城鎮記

美國丁 健良著

彈丸小記

甯波龔 柴著

土國戰事述略

美國文約瑟著

冰洋事蹟述略

美國文約瑟著

計四十二種

海錄

嘉應楊炳南著

余鄉有謝清高者少敏異從賈人走南海南遇風覆其舟拯於番舶遂隨販焉每歲遍歷海中諸國所至輒習其言語記其島嶼阨塞風俗物產十四年而後反粵自古浮海者所未有也與余傾談西南洋甚悉因條記之所述國名悉操西洋土音或有音無字止取近似者名之云

萬山一名魯萬山廣州外海島嶼也山有二東山在新安縣界西山在香山縣界沿海漁船藉以避風雨西南風急則居東澳東北風急則居西澳凡南洋海艘俱由此出口故紀海國自萬山始既出口西南行過七洲洋有七洲浮海面故名又行經陵水見大花二花大洲各山順東北風約四五日便過越南曾安順化界見咕嚕羅山朝素山外羅山順化卽越南王建都之所也其風俗土產志者既多不復錄又南行約二三日到新州又南行約三四日過龍柰又謂之陸柰卽海國聞見錄所謂祿賴也爲安南舊都由龍柰順北風日餘至本底國

本底國在越南西南又名勘明疑卽占城也國小而分于越南暹羅二國之間其人顏色較越南稍黑語音亦微異土產鉛錫象牙孔雀翡翠箭翎班魚脯又順東北風西行約五六日至暹羅港口

現井入越南

暹羅國在本底西縱橫數千里西北與緬甸接壤國大而民富庶船出港口入內河西行至國都約千餘里夾岸林木葱蘢田疇互錯時有樓臺下臨水際猿鳥號鳴相續不絕男女俱上裸男以幅布圍下體女則被裙官長所被衣其製與中國雨衣略同以色辨貴賤紅者爲上右臂俱刺文形若任字王則衣文彩繡佛像其上飛金貼身首器皆以金陸乘象輦水乘龍舟凡下見上裸體跣足屈腰蹲身國無城郭民居皆板屋王居則以瓦覆其上臨水爲之土人多力農時至則播種熟則收穫無事耘鋤故家室盈寧稱爲樂土商賈多中國人其釀酒販鴉片煙開場聚賭三者權稅甚重俗尊佛教每日早飯寺僧被袈裟沿門

托鉢凡至一家其家必以精飯肴蔬合掌拜獻僧置諸鉢滿則回寺奉佛又三分之僧食其一鳥雀食其一以其一飼蟲鼠終歲如是僧無自舉火者出家爲僧謂之學禮雖富貴家子弟亦多爲之弱冠後又聽其反俗其婚嫁男家伴以男女家伴以女俱送至僧寺令拜佛然後迎歸合卺焉頗知尊中國文字聞客入有能作詩文者國王多羅致之而供其飲食國有軍旅則取民爲兵一月之內其糗糧皆兵自備越月然後王家頒發四鄰小國多屬焉土產金銀錢錫魚翅海參鰻魚瑇瑁白糖落花生檳榔胡椒油蔻砂仁木蘭椰子速香沈香降香伽楠香象牙犀角孔雀翡翠象熊鹿水鹿山馬水鹿形似鹿而無角色青大者如牛山馬形似鹿而大商賈常取其角假充鹿茸犀角有二種色黑而大者爲鼠角價賤極大者重二三斤小者亦重斤餘其色稍白而旁有一潤直上者爲天曹角其潤直上至頂者亦不貴若頂上二三分無潤而圓滿色潤而微紅者則貴矣椰木如椶直幹無枝其大合抱高者五六丈種七八年然後結子每歲止開花四枝花莖傍葉而生長數尺花極細碎一枝止結椰子數顆四花分四季采之欲釀酒者則於花莖長盡花未及開時用蕉葉裹其莖勿令花開再以繩密束之砍莖末數寸取瓦罐承之其液滴于罐中每日清晨及午酉亥三時則收其液清晨所收味清甜日出後則微酸俱微有酒味再釀之則成酒矣所砍處稍乾則又削之花莖盡而止椰肉可以搾油壳可爲器衣可爲船纜故番人多種之歲以土物貢中國

國

宋卡國在暹羅南少東由暹羅陸路十七八日水路東南行順風五六日可到疆域數百里海國聞見錄作宋脚緣閩語謂腳爲卡故譌土番名無來由地曠民稀俗不食豬與回同鬚止留下領出入懷短刀自衛娶妻無限多寡將婿男必少割其勢女必少割其陰女年十二卽嫁十三四便能生產男多贅於女家俗以生女爲喜以其可以贅婿養老也若男則贅于婦家不獲同居矣其資財則男女各半凡無來

由種類皆然死無棺槨葬椰樹下以溼爲佳不封土不墓祭王傳位必以嫡室子庶子不得立君臣之分甚嚴王雖無道無敢覬覦者卽宗室子弟國人無敢輕慢婦人穿衣褲男子惟穿短褲裸其上有事則用寬幅布數尺縫兩端襲於右肩名沙郎民見王及官長俯而進至前蹲踞合掌於額而言不敢立王坐受之見父兄則蹲踞合掌於額立而言平等相見唯合掌於額餘與暹羅略同山多古木土產孔雀翡翠瑁象牙胡椒檳榔椰子銀錢沈香降香速香伽楠香海參魚翅歲貢於暹羅

大尼國在宋卡東南由宋卡陸路五六日水路順風約日餘可到連山相屬疆域亦數百里風俗土產均與宋卡略同民稀少而性兇暴海艘所泊處謂之淡水港其山多金山頂產金處名阿羅師阿於何由淡水港至此須陸行十餘日由吉蘭丹港口入則三四日可至故中華人到此淘金者船多泊吉蘭丹港門以其易於往來也國屬暹羅歲貢金三十斤

吉蘭丹國在大尼東南由大尼沿海順風約日餘可到疆域風俗土產略同大尼亦無來由種類爲暹羅屬國王居在埔頭埔頭者朝市之處而洋船所灣泊也周圍種芳竹爲城加以木板僅一門民居環竹外王及官長俱席地而坐裸體跣足無異居民出則有勇壯數十擁護而行各持標槍謂之景子見者咸躡身合掌王過然後起景子猶華言奴僕也王及酋長富家俱有之政簡易王日坐堂酋長有稱萬者有稱斷者咸入朝環坐議政事有爭訟者不用呈狀但取蠟燭一對俯捧而進王見燭則問何事訟者陳訴王則命景子宣所訟者進質王以片言決其曲直無敢不遵者或是非難辨則令沒水沒水者令兩造出外見道路童子各執一人至水旁延番僧誦呪以一竹竿令兩童各執一端同沒水中番僧在岸呪之所執童先浮者則曲無敢復爭童子父母習慣亦不以爲異也又其甚者則有探油鍋法探油鍋者盛油滿鍋火而熱之番僧在旁誦呪取一鐵塊長數寸寬寸餘厚三分許置鍋中令兩造探而出之其理直者引

手入滾油中取出鐵塊毫無損傷否則手如入油鍋卽鼎沸傷人終不能取非自反無愧者始雖強詞鮮不臨鍋而服罪國有此法故訟者無不崛強而君民俱奉佛甚虔也王薨或子繼或弟及雖有遺命然必待天意之所歸而後卽安故嗣王雖卽位若天心不屬民不奉命而兄弟叔姪中有爲民所戴者則讓之而退處其下不然雖居尊位而號令亦不行也土番居埔頭者多以捕魚爲生每日上午各操小舟乘南風出港下午則乘北風返壩南風謂之出港風北風謂之入港風日日如此從無變易是殆天所以養斯民也其居山中者或耕種或採樵窮困特甚上無衣下無禪唯剝大樹皮圍其下體亦無屋宇穴居野處或於樹上蓋小板屋居之凡土番俱善標槍標槍者飛槍也能殺人於數十步外出入常以自隨乘便輒行却殺人其山多木易于避匿故山谷僻處鮮有行人有爭訟而酋長不能斷者常自請於王願互用標槍死無悔王亦聽之但酌令理直者先標中而死則彼家自以尸歸不中則聽彼反標顧鮮有不中者俗淫亂而禁婦女嫁中華故閩粵人至此鮮娶者有妻皆暹羅女也犯姦者事發執而囚之度其身家厚薄而罰其金謂之阿公凡犯令者亦然少笞杖之刑其金一日不納則次日倍罰若抗不納則囚禁無釋時亦無敢抗者若本夫覺其姦執殺之亦不禁國有大慶王先示令擇地爲場至期於場中飲酒演戲國人各以土物貢獻王受其儀於場中賜之飲食四方來觀之華夷雜沓姦賭無禁越月而後散凡進獻及餽賀其儀物皆以銅盤盛之使者戴於首而行飲食不用箸多以右手抓取故重右手而輕左手人若以左手取食物相贈遺則怒以爲大不敬云地多瘴厲中華人至此必入浴溪中以小木盥水自頂淋之多至數十桶俟頂上熱氣騰出然後止日二三不浴則疾發居久則可少減然亦必日澡洗卽土番亦然或嬰疾察其傷於風熱者多淋水卽瘳無庸藥石凡南洋諸國皆然其名雙戈及牙刺頂等處皆產金由吉蘭丹埔頭入內河南行二日許西有小川通大尼阿羅師又南行日餘雙戈水會之又南行十餘日則

至牙賴頂與邦項

讀平聲

後山麻姑產金處相連河中巨石叢雜水勢峻厲用小舟逆挽而上行者其艱中

國至此者歲數百閩人多居埔頭粵人多居山頂山頂則淘取金沙埔頭則販賣貨物及種植胡椒凡洋船到各國王家度其船之大小載之輕重而權其稅船大而載重者納洋銀五六百枚小者二三百不等謂之覓頭金客人初到埔頭納洋銀一枚居者歲又納丁口銀一枚謂之亞些各貨稅餉謂之碼子居吉蘭丹山頂淘金欲回中國者至埔頭必先見王納黃金一兩然後許年老不復能營生者減半若甲必丹知其貧而爲之請則免甲必丹者華人頭目也居埔頭者則俱免若洋船有藏匿覺察則船主阿公船主是洋船出資本置買貨物者凡洋船造船出賃者謂之板主看羅盤指示方向者謂之夥長看舵者謂之太工管理銀錢出入者謂之財庫艙口登記收發貨物者謂之清丁而出資賃船買貨貿易則爲船主船中水手悉聽指揮故有事亦唯船主是問其釀酒販鴉片開賭場者碼子亦特重私家通負酋當置若罔聞而賭帳則追捕最力各國多如此食鴉片煙則吉蘭丹爲其客商鮮不效尤者其土產唯檳榔胡椒爲多亦以三十斤金爲暹羅歲貢

丁加羅國一名達拉岸在吉蘭丹東南由吉蘭丹沿海約日餘可到疆域風俗與上數國略同而富強勝之各國王俱喜養象聞山中有野象王家則令人砍大木於十里外周圍柵環之旬日漸移而前如此者數柵益狹象不得食俟其羸弱再放馴象與鬪伏則隨馴象出自聽象奴驅遣土產胡椒檳榔椰子沙藤冰片燕窩魚翅海參油魚鮑魚螺頭帶子紫菜孔雀翡翠速香降香伽楠香帶子角帶也形如江瑤柱胡椒最佳甲於諸番歲貢暹羅安南及鎮守葛賴八之荷蘭

邦項在丁加羅南古志多作彭亨以謝清高所述音近邦項故改從此二字其餘亦多類此由丁加羅陸路約二日可到疆域風俗民情均與上數國同亦產金而麻姑所產爲最土產胡椒冰片沙穀米胡椒藤

本初種時長尺餘年餘長至數尺則捲成圈復取土掩之俟再生然後開花結子十餘年藤漸弱則取其旁舊土或有雜木葉霉敗其中者糞之復茂不可以他物糞至三十餘年則不復結子須擇地另種舊地非百年後不能種也子熟採而軋之色黑而縐味辛辣而性溫其極熟者則雖乾而圓滿去其皮是爲白椒其性更烈自安南至麻倫尼諸國皆有唯丁加羅所產爲最冰片木液也周流木內夜則上於樹秒明則下於樹根土番夜聽其樹而知其上下老嫩俟其老時四鼓潛往以刀削其根數處如中國之取松脂然天明其液流於砍處落地滴滴成片若未老則出水而已沙穀米亦以木液爲之其木大者合抱砍伐破碎舂之成屑則以水洗之去其滓俟其水澄取其下凝者暴乾成粉復以水灑之則縈縈如顆珠煮食之可以療飢以上數國閩粵人多來往貿易者內港船往各國俱經外羅山南行順風約一日過門筒大佛山又日餘經龍柰口過崑崙海日餘見崑崙山至此然後分途而行往宋卡暹羅大尼吉蘭丹各國則用庚申鍼轉而西行矣由邦項東南行約日餘復轉西入白石口順東南風約日餘則到舊柔佛

以上自宋卡至

邦項皆屬暹羅

舊柔佛在邦項之後陸路約四五日可到疆域亦數百里民情風俗略與上同土番爲無來由種類本柔佛舊都後徙去故名舊柔佛嘉慶年間英吉利於此開展土地招集各國商民在此貿易耕種而薄其賦稅以其爲東西南北海道四達之區也數年以來商賈雲集舟船輻輳樓閣連亘車馬載道遂爲勝地矣番人稱其地爲息辣閩粵人謂之新州府土產胡椒檳榔膏沙藤紫菜檳榔膏即甘瀝可入藥

麻六甲在舊柔佛西少北東北與邦項後山毗連陸路通行由舊柔佛水路順東南風半日過琴山徑口又日餘到此土番亦無來由種類疆域數百里崇山峻嶺樹木叢雜民情兇惡風俗詭異屬荷蘭管轄初小西洋各國番舶往來中國經此必停泊採買貨物本爲繁盛之區自英吉利開新州府而此處浸衰息

矣土產錫金香片沙藤胡椒沙穀米檳榔燕窩犀角水鹿瑇瑁翡翠降速伽楠各香閩粵人至此採錫及貿易者甚眾

沙刺我國在麻六甲西北由麻六甲海道順東南風二三日經紅毛淺下有浮沙其水不深故曰淺謂之紅毛則不知其何取也此國在紅毛淺東北岸疆域數百里民頗稠密情性兇獷後山與丁加羅吉蘭丹相連山中土番名擦讀力子裸體赤足鳩形鵠面自爲一類亦服國王管轄但與無來由不相爲婚嘗取蜜蠟沙藤沈香速香降香犀角山馬鹿脯虎皮等物出與國人交易閩粵人亦有到此者其產錫冰片椰子沙藤

新卑海中島嶼也一名布路檳榔又名檳榔士英吉利於乾隆年間開闢者在沙刺我西北大海中一山獨峙周圍約百有餘里由紅毛淺順東南風約三日可到西南風亦可行土番甚稀本無來由種類英吉利招集商賈遂漸富庶衣服飲食房屋俱極華麗出入悉用馬車有英吉利駐防番二三百又有敍跋兵千餘閩粵到此種胡椒者萬餘人每歲釀酒販鴉片及開賭場者權稅銀十餘萬兩然地無別產恐難持久也凡無來由所居地有果二種一名流連子形似波羅密大而多刺其肉極香甜一名茫讀莫姑生又名茫果栗形如柿而有壳味亦清甜

吉德國在新卑西北又名計達由新卑順東南風日餘可到後山與宋卡相連疆域風俗亦與宋卡略同土曠民稀米價平減土產錫胡椒椰子閩粵人亦有至此貿易者由此陸路西北行二三日海道日餘到養西嶺讀力陸路又行二四日水路約一日到蓬牙俱暹羅所轄地自宋卡至此皆無來由種類性多兇

暴出入必懷短刀以花鐵爲之長六寸有奇鑲以金海馬牙爲柄其刀末有花紋者持以相鬪刀頭有紋者則佩之以爲吉慶王及酋長皆然海馬出麻沙密紀卽鬚毛烏鬼國也形似牛而腳短居水中偶上岸

食草或曝於沙墀取之之法用大木七八尺方之令上窄下寬上輕下重空其中上有蓋爲環鈕於內旁穿四孔遇海馬在沙墀則三四人各挾標槍二入木中令人蓋之而放於上流水隨流而下海馬見之必趨赴翻弄覺其無物則置之而復息於墀比其木流至墀前木中人急去其蓋各舉槍標之槍有倒鉤以繩繫之中則趨上岸將繩縛於木而縱收之俟其力稍乏各加一標死則宰而食之其味甚美牙以鑲刀柄

烏土國

即緬甸烏土蓋其別名也

在暹羅蓬牙西北疆域較暹羅更大由蓬牙陸路行四五日水路順風約二日到佗

歪爲烏土屬邑廣州人有客於此者又北行百餘里到媚麗居又西北行二百餘里到營工又西行二百餘里到備姑俱烏土屬邑王都在盡晝由備姑入內河水行約四十日方至國都有城郭宮室備姑鄉中有孔明城周圍皆女牆參伍錯綜莫知其數相傳爲武侯南征時所築入者往往迷路不知所出云北境與雲南南掌接壤雲南人多在此貿易衣服飲食大略與暹羅同而樸實仁厚獨有太古風民居多板屋夜不閉戶無盜賊爭鬪國法極寬有過犯者罰之而已重則圈禁旬日而釋無殺戮撲楚之刑實南洋中樂國也男女俱椎髻婚娶或男至女家或女至男家交拜成親死則聚親友而哭之旋葬於山不封不樹土產玉寶石銀魚燕窩魚翅犀角泥油紫菜兒茶寶石藍者爲貴以其難得也泥油出土中可以然鑊紫菜亦土中所出其色紫土人以代印色自安南至此及南洋諸國沿海俱有鱷魚形如壁虎是食人土番有被鱷吞者延番僧呪之垂釣於海食人者卽吞鉤而出其餘則不可得而釣也由備姑西北沿海數千里重山複嶺并無居人奇禽怪獸出沒號叫崇巖峭壁間多古木奇花所未經覩舟行約半月方盡小海外奇觀也

徹第缸在烏土國大山之北數十年來英吉利新闢土地未有商賈其風俗土產未詳

明牙刺英吉利所轄地周圍數千里西南諸番一大都會也在徹第缸海西岸由徹地缸渡海順東南風約二日夜可到陸路則初沿海北行至海角轉西又南行然後可至爲日較遲故來往多由海道其港口名葛支里港外沿海千餘里海水渾濁淺深叵測外國船至此不能遽進必先鳴轍使土番聞之請於英吉利命熟水道者操小舟到船爲之指示然後可土番亦必預度其淺深以泡志之泡者截大木數尺製爲橈形空其中繫之以繩墜之以鐵隨水道曲折浮之水面以爲之志土番謂之泡每一望遠及轉折處則置一泡然外人終不能測是殆天險也港口有轍臺進入內港行一日許到交牙轍臺又三四日到古里葛達英吉利官軍鎮明牙刺者治此有小城城內唯住官軍商民環處城外英吉利官吏及富商家屬俱居漲浪居漲浪居者城外地名也樓閣連雲園亭綺布甲於一國英吉利居此者萬餘人又有敍跋兵五六萬卽明牙里土番也酋長有三其大者稱卽有士第其次爲尼里又次爲集景皆命於其王數年則代國有大政大訟大獄必三人會議小事則聽屬吏處分其統屬文武總理糧餉一人謂之辣亦數年而代其出入之儀仗較之酋長特盛前有騎士六人後有四人左右各一人俱穿大紅衣左右二人裝束俱同辣唯辣所穿衣當胸繡八卦文爲異耳凡鞫獄訟上下俱穿黑衣唯三酋長兩肩有白絨緣頭戴白帽用白髮織成狀如風帽酋長上坐客長十人旁坐客長客商之長也每會鞫必延客長十人旁坐者欲與眾共之也其獄必僉曰是然後定讞有一不合則復鞫難再三不以爲煩然怙奢尚利賄路公行徒事文飾無財不可以爲說也其土番有數種一明牙里一夏里一巴藍美明牙里種較多而巴藍美種特富厚明牙里食牛不食豬夏里食豬不食牛巴藍美則俱不食富者衣食居處頗似英吉利以華麗相尚貧者家居俱裸體以數寸寬幅布圍其腰又自臍下絆至臀後以掩下體男女皆然謂之水幔無來由番亦多如此出門所圍布幅稍寬有吉慶則穿長衣窄袖其長曳地用白布二丈纏其頭以油徧擦其身所居屋

盡塗以牛糞俗以螺壳有文彩者爲貨貝交易俱用之娶妻皆童養夫死婦不再嫁髮髮而居各種不相爲婚男子胸蓋小印數處額上刺紋女人皆穿鼻帶環巴藍美死則葬於土餘俱棄諸水有老者子孫親戚送至水旁聚而哭各以手撫其死屍而反掌自舐之以示親愛徧則棄諸水急趨而歸以先至家者爲吉明牙里間有以火化者更有伉儷敦篤者夫死婦矢殉親戚皆勸阻堅不從則聽之將殉先積柴於野置夫屍於上火之婦則盡戴所有金銀珠寶玩飾繞火行哭親戚亦隨哭極慟見屍將化婦則隨舉諸飾分贈所厚而跳入火眾皆嘖嘖稱羨俟火化而後去每歲三四月則羣聚而賽神於廟門外先豎直木一再取一木度其長之半繫孔橫穿直木上令活動可轉橫木兩端各以繩繫鐵鉤二有數人赤身以長幅布圍下體手結一籃籃內裝各種時果立其下眾先取兩人以橫木兩端鐵鉤鉤其背脊兩旁懸諸室中手足散開狀如飛鳥觀者舉橫木推轉之其人則取籃中果分撒於地羣爭拾之果盡復換兩人眾皆歡笑不以爲苦也得果者歸以奉家長及病者以爲天神所賜云自此以西地氣漸寒中華人居此者可穿夾衣自此以東及南洋諸國天氣俱和暖四時俱可穿單衣土產鴉片煙硝牛磺白糖棉花海參瑤瑁訶子檀香鴉片有二種一爲公班皮色黑最上一名八第占刺皮色赤稍次之皆中華人所謂烏土也出於明牙刺屬邑地名八旦羣其出曼達刺薩者亦有二種一名金花紅爲上一名油紅次之出馬刺他及盎幾里者名鴨屎紅皆中華人所謂紅皮也出孟買及卽肚者則爲白皮近時入中華最多其木似嬰粟葉如靛青子如茄每根僅結子二三顆熟時夜以刀割其皮分許膏液流出凌晨收之而浸諸水數刻然後取出以物盛之再取其葉曝乾末之雜揉於其中視葉末多少以定其成色葉末半則得膏半然後即捏爲團以葉裹之子出膏盡則拔其根次年再種邇年以來閩粵亦有傳種其流毒未知何所底止也

曼達刺薩在明牙刺西少南由葛支里沿海陸行約二十餘日水路順東風約五六日俱英吉利所轄地

至此別爲一都會有城郭英吉利居此者亦有萬人敘跋兵二三萬此地客商多阿里敏番卽來粵東戴三角帽者是也土番名雪那里風俗與明牙里略同土產珊瑚珍珠鑽石銀銅棉花訶子乳香沒藥鴉片魚翅蝦梭多梭多形如小洋狗又有金邊洋布價極貴一正有值洋銀八十枚者內山爲堯包補番堯包補者猶華言大也本回回種類其間國名甚多疆域不過數百里所織布極精細大西洋各國番多用之笨支里在曼達刺薩西南爲佛郎機所轄地由曼達刺薩陸行約四五日水行約日餘卽到土產海參魚翅訶子棉花蝦梭多內山亦屬堯包補

尼古八當國在笨支里西嶺介中疆域甚小土番名耀亞

西嶺在笨支里少北又名古魯慕由笨支里水路約六七日陸路約二旬可到爲荷蘭所轄地土番名高車子風俗與明牙里略同內山爲乃弩王國土產海參生於海中石上其下有肉盤盤中生短蒂蒂末卽生海參或黑或赤各肖其盤之色豎立於海水中隨潮搖動盤邊三面生三鬚各長數尺浮沈水面採者以鉤斷其蒂撈起破之去其穢煮熟然後以火焙乾各國俱有惟大西洋諸國不產

以上自明牙刺至西嶺皆東中南三印度

東畔沿海各埔頭

打冷莽柯國在西嶺西北順東南風西北約二三日可到疆域甚小民極貧窮然性頗淳良風俗與上略同沿海屬邑有地名加補者西洋客商皆居此土產海參魚翅龍涎香訶子

亞英加在加補西北順風約五六日可到爲英吉利所轄地土番風俗與上略同土產棉花燕窩椰子訶子

固貞在亞英加西北水路順風約日餘可到爲荷蘭所轄地土番風俗與上略同內山爲晏爹尼加國實回同種類土產乳香沒藥魚翅棉花椰子蘇合油血竭砂仁訶子大楓子

隔瀝骨底國在固貞北少西水路順風約二日可到陸路亦通風俗與上同土產胡椒棉花椰子等俱運至固貞售賣內山仍屬晏爹尼加

馬英在隔瀝骨底北少西水路順風約二日可到爲佛郎機所轄地土產風俗與上略同內山亦屬晏爹尼加

打拉者在馬英西北陸路相去約數十里爲莫吉利所轄地土產風俗亦與上同土產胡椒海參魚翅淡菜內山仍屬晏爹尼加

馬刺他國在打拉者西疆域自東南至西北長數千里沿海邊地分爲三國一小西洋一孟婆羅一麻倫尼爲回回種類凡拜廟廟中不設主象惟於地上作三級取各花瓣徧撒其上羣向而拜或中間立一木樵每月初三各於所居門外向月念經合掌跪拜稽首土產棉花胡椒魚翅鴉片

小西洋在馬刺他東南沿海邊界由打拉者向北少西行經馬刺他境約六七日到此爲大西洋所轄地疆域約數百里土番名盈丟奉蛇爲神所畫蛇有人面九首者婚嫁與明牙里同死則葬於土每年五月男女俱下河洗浴延番僧至河邊女人將起必以兩手淘水洗僧足僧則念呪取水饋女面然後卽穿衣起又有蘇都魯番察里多番古魯米番三種多孟婆羅國人西洋人取以爲兵其風俗與盈丟略同西洋番居此者有二萬人士產檀香魚翅珊瑚犀角象牙鮑魚謝清高云昔隨西洋番舶到此時船中有大醫院者聞其妻死特遣土番齎札回大西洋祖家請於國王以半俸給其家養兒女是知此地亦有陸路可通大西洋也

孟婆羅國在小西洋北山中由小西洋水路順風約日餘可至國境王都在山中以竹爲城疆域亦數百里風俗與小西洋同土產檀香犀角